

出使美日秘國日記

出使美日祕崔日記

七月初一日晴

金山工黨既禁華人之來繼見金山華商依然列肆按照公法例不能禁遂謂華人所居之地污穢宜另指一地使之遷徙聞該工黨又請於地方官矣

初二日晴

聞西班牙夏間各廷臣又易云金山領事來稟言工黨逼遷唐人街事因查美國工黨蓋無日不妒忌華人也未來者禁絕之已來者攪擾之必使之不安於居焉然華人亦有自取之道矣各堂之讎殺鴉片之匿稅屢懲之而不止此二者實人心風俗之憂爲

美國之所厭惡者也此挽回之所以難也

初三日 時雨時晴

謁律司科司達告以金山工黨事律司謂俟其行例時然後駁之
并使永遠不行此非其時駁無益也

初四日 晴亦有雨

黑龍江漠河金礦業經開採金苗甚旺茲聞距三姓東三百里距
吉林省一千三百六十里地名巴虎其地山川雄鬱產金之地二
百餘處俄人覬覦之間當道已奏請開採派員往查風氣日開富
強有漸殊可喜也

初五日 雨申刻雨止戌刻大風雷雨

美國人列都約翰來書以舍路埠地方華人來往阻滯請添設領事因以未奉

國家之命婉辭之因查洋人趨利之心無孔不入美國工黨禁華人華人所以來往阻滯苛禁不除雖添設領事空糜庫帑耳何益於華人哉

初六日卯刻見日日出而雲重雨

越南法國兵弁至紅火山攻不服法人之黨法兵受傷甚多法統領馬凌受槍傷至重搶回而死又爲越人梟首而去法議政局議借六十兆佛郎經營越南因謹按越南臣服中國不侵不叛惜風氣未開而爲法國所滅然黑旗之勇法人畏之淮軍克復諒山

法人父哭其子兄哭其弟無不歸咎於創議之人至今日而兵弁之駐防者損傷未已也爭地殺人者足以鑒矣

初七日 晴北風天氣驟涼

德國漢地紳士將以漢地故紳大屋贈前相畢思麻以禦冬蓋以畢公現居之第寒氣逼人不宜於冬故也此可見德人之愛畢相云 因嘗考德國之地與民數及其建國之地而歎德國之難治也又嘗考拿破侖第一之虎視歐洲分裂德國而歎德國之難圖存也又嘗考同治十年德法之戰而歎德國中興之業爲不可及也聖君賢相並耀千秋今其君威稜第一已薨尙餘畢相痛定思痛宜民之不能忘哉

初八日晴北風可著夾衣

西報載越南河南地方土人與法人交仗勢甚勇敢土人僅有快槍六十桿而法兵數倍之法兵決爲寡不敵衆銳進圍之土人四面應敵槍無不中法兵不敢前土人竟潰圍而出只傷三人法兵之死者十倍云 因謹按亞細亞洲法國向無屬地僅東印度一隅耳自咸豐十一年乘中國之亂遂踞東京不三十年全有其地越南爲之不祀共至今不靖者亦民之不忘舊君也

初九日晴涼

英國之新鐵甲戰船名安生方於前年竣工下水近奉提督之命曾操各水師兵法陣法及練操畢後覺船中機器有損嗣在提文

礮船陽察驗查其中機器多損兵部大臣謂此中必有取巧作弊者現已札飭某水師提督隨帶合同馳往製造原廠逐款辨駁以期更換損壞機器據聞安生鐵甲當初造價計英金二百萬磅噸位尙在外云、因查製造船廠各廠其利甚鉅其弊亦多凡訂造兵艦者非諳練之人則不適用日本於法國船廠所造之兵艦是也而不能以貞廉自持者每致中飽此則悉數難終矣

初十日晴亦雨

謁律師 美議院議美與各國交易須利益均沾如進口各國向得免稅者查其出產之處而請與國亦以利益相答茶葉向來免稅而美國虐待中國之民知中國必不滿意將以美之所以待華

人者加之於在中國之美商今雖有議料中國斷不允遂中止云
因嘗考歐墨各國之稅則無不隨時變通惟中國則一定不易
耳美於中國貨物入口所抽之稅有值百抽五六十者有幾與成
本相埒者宜其歲入至銀三四萬萬圓矣

十一日晴戊初雨夜小雨

金山十七號報言美國鉢崙地方之鐵路公司分造鐵路數條以
資利便均用華工現擬招華工五百名前往古市比埠以期集事
云 因每與美之紳商相接必詢華工在美情形大約西省之紳
即金山一帶必惡華人受工黨之舉也其餘則不然商人則無不愛華
人者爲其工價廉而能耐勞苦也然商人惡工黨而勢實不敵蓋

美之保舉總統議紳計人數而不計貧富一公司而用工人數千人博高位者安肯顧公司而得罪於工黨哉

十二日晴天涼可覆薄棉

去年中國產絲較前四年爲多蓋觀於上海廣東二口出口之數而可知也廣東出口之絲較前年爲多日本則去年之絲較前二年爲少然自一千八百八十五年至一千八百八十八年出絲日盛去年雖少無甚大損觀東方出絲數目知大有起色矣

十三日晴

美國民數於六月一號起查今告成按總辦戶口之報知本國現有六千二百四十八萬零五百四十人按一千八百八十年本國

人數計五千零十五萬五千七百八十三人此十年中人數加至
二成蓋因別國入美境者共有五百二十四萬六千六百十三人
云 因謹按華人至美較歐洲各國不過四十分之一耳而美廷
禁之者則以招工黨之忌又以不入美籍而無援也

十四日晴

義大利王子至德以固德奧意三國同盟之局雖畢思麻去位依
然不變云 因謹按義大利古稱羅馬二百年前曾霸歐洲今國
勢非舊然水師之力足繼英法而稱強焉惜國債纍纍力不能持
久矣合縱解而秦遂王德義奧之盟寒而俄難制義有智謀之士
焉敢不固三國之交哉

十五日晴

美廷電諭金山稅務司加抽入口之鴉片煙膏每磅稅銀十二圓云 因查外國稅則其輕重懸殊者非苟然也大約本國所必需之物其稅必輕或免稅以招徠之如美國之於茶葉是也奪本國土產之利者其稅較重所以保本國之利如美於中國之米紬是也其於無益於日用之物者其稅尤重以其糜費於無用之地欲民間惡而絕之如各國之於煙酒美國之於鴉片是也凡此皆具有深心而各國一轍者也

十六日晴

美廷搜購現銀本月已購到一百二十餘萬兩各處銀根十分窘

急銀行尤爲喫緊幾不能支持云 因嘗考外國之錢法矣金銀二物鑄成錢者用以平準貨物自一以至十自萬以至兆計數而已平不待權色不待驗豪強無可把持愚賤無可抑勒民得其便而上得其利金銀均有益餘錢各國皆然蓋無殊風氣矣至不鑄錢之金銀則與貨物相同因時計值不能當錢以交易也

十七日晴

美國戶部購買銀輒銀輒驟漲遂派員至墨西哥國查看銀礦現墨國銀礦主均僱工開採矣 因查墨國與美接壤鑛地亦多乃美富而墨貧國勢相反嘗以詢之美紳美紳言墨洲之人民以墨西哥爲最懶歐洲之人民以土耳其爲最懶皆不可救藥者風氣

不轉殆將亡矣

十八日晴

英人於緬甸測道設鐵路達怒江入雲南以通商其路自曼得來東向沿經商舊路至肯龍渡始與怒江相接長三百英里需費銀三百五十萬磅 因謹按緬甸之地物穆亘古未開十餘年前聞緬甸以英人垂涎其地乃備武備以象負礮出入城門以耀兵其礮爲銅質而塗以金英人視之以爲不值一笑茲英人據有其土測道路興火車鑿破渾沌其志不在小矣惜哉

十九日晴

金山居民日眾原設信局日不暇給美廷郵政部以金山地方日

關四至日遠議增信局以收利益 美廷以法國絀正國人愛用
入境日多以致銀錢出境亦多欲防漏卮於是加抽絀正之稅而
法國商人卽與美國向辦絀正之商同議合湊資本二百萬圓卽
於紐約設廠製造以避重稅云 因謹按外國求利之心如水銀
瀉地無孔不入中國亦以興利爲言而用心遜其精舉事亦遜其
敏風氣未開也

二十日晴

朝鮮代辦繙譯來見 聞墨洲之千家埠本隸卑勞支晏國地得
一百二十萬丁方居民約三十萬現英國欲以重金購之該國國
王已赴英商議矣 因謹按以金購地此古今一創局也美國旣

擬購聖駝馬島英國亦擬購千家埠葡萄牙且欲以屬地出售於他邦風氣之新實有非意料所及者矣前此未之聞也

二十一日雨中夜雨止雲重

美國報單紀自一千八百二十年至一千八百五十四年華人至美甚稀其年始聞金山有金穴於是華人至美者一萬三千人此第一次至多之數以後多寡不一每年約四千至七千之間至一千八百八十二年華人至美者三萬五千六百十一人美國乃亟設例禁之云 因營綜各國民人之至美者合而權之華人至美實不及英國百之一也顧各國之民皆入美籍而華人獨不然入美籍者皆得操保舉總統議紳之權而華人獨否是美國人望欲

爲總統議紳者舉無求於華人且各國民人之入美籍者合爲一黨不入美籍之華人獨爲一黨其勢孤矣焉能安居於美哉

二十二日 晨起陰晴參半晴熱

俄屬西比利亞興造鐵路有美國人名必打非路現寓俄國欲承攬此工擬由俄京通西比利亞以達太平洋俄皇願交美國人包造以求速成俄臣則謂宜由本國興造現已有俄員到美商議此事因按製造之利大矣觀於各國之攬兵艦鐵路工程而知之也英法德美各國滬上均設經理出售船礮槍彈之洋行中法越南分界之約法人以包攬中國鐵路載之約章茲美人又欲攬俄之鐵路英法美德此四國者制造著名而富亦著名救時者可知

所趨向矣

二十三日 晴熱如暑

倫敦來電言印度東北之阿富汗北與俄界英以阿爲印度屏障故羈縻之以固印度阿若向俄則俄勢重近聞阿竟與俄通商英甚憂之云 因查土耳其爲歐洲之屏蔽歐洲各國之所重也阿富汗爲印度之屏蔽英國之所重也古之籌邊者籌之於數千里外以爲遠矣今則籌之數萬里之外并於本洲之外非好爲馳騁也時勢不同也

二十四日 晴

俄國新造一水雷船名曰壓刺每半時能行三十一海里英報謂

自有輪船以來未有如此速者英國至速之船不過半時行二十
三海里耳於是英廠工師創言於英廷云如不惜重資能造一船
每半時辰準行四十海里云云 因按每半時辰行四十海里以
海里之三合中里之十乘之則一時辰行二百二十餘里矣地球
徑九萬里船行四十日可以一周機器誠巧矣哉

二十五日晴

美廷有諭令購白鐵以爲軍器之用美商因留意鑛產鍊白鐵以
求利益 因查白鐵者非中國所用之尋常白鐵乃外國所名爲
尼克耳又名爲銀向產於德國其色如銀故歐洲稱之爲德國銀
其質之堅過於鋼而不生鏽近美國亦產此川爲鐵甲較鋼尤堅

彈之能透鋼者尙不能透白鐵也

二十六日晴

美國朝鮮來電云太妃薨後高王懼變乃請援於美國日本二公使遂有美日水師兵自仁川至列隊入都圍兩使館列營數日無事始撤回 因謹按光緒十一年北洋大臣與日本公使伊藤約中日兩國均不得以兵入朝鮮都城至巨文一島中英亦經商定不得租與他國今皆違約何也

二十七日 時雨時晴頻雨頻晴雨則暴雨晴則天青見日如中國

五月時

拜發期滿請獎摺 律師來言美廷以華人多自墨西哥及英界

掩入議院現已派員往查以便設防云 因查自光緒十四年美國悍然背約行禁工之例而華人不能入境乃由英屬之卡拿大墨西哥之邊境潛繞而入於今二年至是而爲美廷所覺乃議設防過此以往禁例益加密矣

二十八日 亦時雨時晴天氣益熱

檀香山島商董程汝楫來文以該國欲招華工而又立苛例以禁制之使不得自由查招工既不合例而苛虐華人之風亦不可長中國與該國向未立約無從辨詰卽謁該國駐美公使託其轉致該國政府該使允之

二十九日 陰晴

美國官紳言朝鮮欲向美國貸款事尙未成 因查歐洲之日斯巴尼亞葡萄牙向稱大國均以負重債而國漸貧弱土耳其竟稱債國又無論矣墨洲則墨西哥負法國之債幾至加兵闕都拉朝不保暮有明徵矣朝鮮初與美國交涉而遠議借貸非計之得者也

八月初一日 元吉晴

聞土耳其國王因懼義大利國欲佔奪德柏勒地方事近來大增軍額並整飭將士戒備不虞云 因查土耳其兵額名爲七十萬人其實可以捐免又且僱人代替有名無實安能致用於臨時乎其所購鐵甲兵船永不出海常泊海口蓋武備之廢弛久矣所謂

整飭者安在哉

初二日晴

華盛頓省鴉連埠工人結黨與華人約限二十日移出該埠不許逗遛否則以勢驅之華人急電金山總領事山左庚轉電請援遂繕葉商之律師急照美外部

初三日晴

美國日報載德國般孖蘭拿地方所墾之地甚廣現因德人少而工價貴議僱華人已發信至香港矣可見華人有益於地方其嫉之者實由工人之妒忌耳 因查歐墨各國之入美籍者近二十年中已二十餘兆此種人既入美籍卽與美國之工人合而爲一

其勢大矣華人則憂憂獨遣其勢遂孤凡有血氣皆有爭心黨同伐異自古已然華人安能容於美哉

初四日晴

接美外部照覆已電鴉連埠巡撫速爲保護華人 俄太子親帶水師兵艦四艘由歐洲往新金山新加坡西貢以及中國各通商口岸云 因嘗聞俄之前王名彼德者以俄國水師未強曾變姓名入歐洲充兵船水手數年乃歸因以整飭海軍以視商之武丁學於甘盤遁於荒野者如出一轍近十年來英之世子既遊印度復遊歐亞各大國茲俄世子又接其武皆習勤勞廣聞見之意也

初五日晴

越南東京人民惡法屢犯法營法國駐防之兵不能制法廷祕而不宣因現在方擬借款以爲東京之用恐議院不允也 因謹按當漢之時珠厓向化來歸稍有反覆卽議棄之以甯人也越南不服法人與法相抗仍嚴守之以足欲也法於亞洲無屯煤之地不得越南則海軍不得橫行於亞洲故不輕棄耳

初六日晴

美外部來信並附鴉連埠巡撫覆外部之函云已設法解散土人保護華人矣 俄國諭稅關於進口英國鐵器棉紗之稅加重抽自百之三十至百之四十云 因查稅則者國之內政匪特大國可以自主卽小國亦可以自主也歐墨各洲於他國重吾入口之

貨稅者則亦增彼國之貨入吾境者以報之謂之抵制如法之於日歐洲各國之於美是於我國減收他國之貨稅者則請他國減收我國貨稅以報我謂之報施如美於各國報施之約是無抵制則弱弱則交涉者狎而玩之匪特不足以市惠也而并因以招侮難矣哉

初七日晴

勃爾加厘亞國君內政修明外交亦固俄主擬廢之而另立云

因謹按晉之伐潞也謀於諸大夫諸大夫以爲宜待後人伯宗以爲其君無德不討後之人或敬奉德義而可討乎此幸其君之庸也勃國之君哈吞腦先曾爲某國之兵官賢能久著殆與威稜第

一之出身同矣俄欲干預其政而可任其國有賢君乎宜其欲廢之也

初八日晴

倫敦來電言英國開闢阿非利加洲新土建築鐵路由夢白柵地方起一路插標以爲日後卽由此始創地步以免再勞云 因按今之立言者曰渾沌勿鑿曰爲天地留不盡之藏其言至大純粹精也然巢窟易而爲宮室矣羽皮易而爲衣裳矣飲血茹毛易而爲粱肉矣迄於今歐洲之風氣全開所未開者亞洲之琉球越南猶有古風阿非利加一洲則全係黑人榛榛狉狉是真渾沌未鑿而爲天地留藏者也乃本洲之人爲天地留之而他洲之人爲開

闕之讀詩至山樞三章未嘗不憬然有感也蓋斷章取義乎

初九日晴

英兵部飭令武大員數人卽將新式無煙火藥入大小各礮試演該武員等演後稟報兵部大臣謂此宗無煙火藥實軍火中利器且所向尤準敵人無從知覺兵部大臣擬卽廣爲製造分給各營各防礮臺云 美國化學家新得無煙火藥製法貽書本署索價銀一百萬圓則當傳授外洋向例如此也因考火藥爲硝磺炭三者合成硝炭本無煙其有煙者磺耳若以樟腦代磺則必無煙惜未一試然可以意揣也

初十日晴

聞

醇親王病勢頗重美國君臣以爲中國之所恃者內則

醇親王外則李鴻 此二人者關係甚重惟望其政躬安善焉

德人之在阿非利加洲東者今出重貲僱人爲導入其內地蓋爲
闢土地計非遊歷也 因謹按地球爲四大洲近以澳大地亞方

輿甚廣亦以洲名墨與澳四面瀕海均自成一洲者若歐羅巴洲
亞細亞洲阿非利加洲雖名三洲其實共一片土耳歐洲之人好
尋新地墨洲始爲日斯巴尼亞所得今或自主或英法各國分裂
之土人已式微矣澳洲始爲和所得繼而棄之法人因之而又棄
之終歸於英英以爲外府焉近年以來實無可闢之地則謀分裂

阿洲英人綢繆獨早已占先著必操勝算德法次之日與葡又次之從此阿洲不祀而作歐洲之外府矣惜哉

十一日晴

英名將華士里近著一論登於日報云嘗覽天下大局究其盛衰消息之理而知將來得志於五洲者必中國也華人數多堅忍耐勞中國又講求武備其機易轉爲英國計莫如結華以爲援至德法兩國戰事必不能免此非常戰爭興亡得失卽在一舉云 因嘗考地球各國之民數中英俄美德法六國最多英與法爲鄰俄與德奧爲鄰德則閒於俄法故皆練兵以自固而勢遂強中國民數多於英俄美國民數多於德法而強似不及者則不尙武之故

也然百年以前歐洲各國風氣未開通商者只葡萄牙和澳門一島西北與俄鄰中間甌脫相距甚遙今則非昔比矣俄患漸近英法各屬地之在南洋者近傍門戶時勢不同未可拘守舊轍也美處墨洲同洲皆小邦向無外侮自輪船日精歐洲各國五日可抵紐約非若往年可侖比亞之來墨洲者越半年而始至也美鑒於此近年亦修武備听夕不遑識時務者爲俊傑無遠慮者有近憂所願沈幾觀變者投袂而起焉

十二日晴

謁議院紳麥美倫該紳已回本省矣 赴律師處商照美外部事及日設領事祕國華人自舉領事事律師謂照美外部駁詰苛例

外部無權能廢小呂宋設領事日國必不允設此二事者不過盡心焉耳祕魯積弱所商者可委曲相從勉力爲之彼富不能不允因以爲然遂辭出

十三日 兩酉刻時

佛及尼亞教會來書云已稟請美議院廢禁止華人例除錄一分呈總統外應并呈大清欽差並中國政府鑒之因卽作書覆之以爲此例殊違公法而背條約廢之自是理所當然云 因按美國教士向無爲總統議紳者故無覬覦爲總統議紳之心而因無求於工黨也且美教士之行教於中國者畏中國民人之報復則有性命之憂此又有求於中國也宜其立言如是也

十四日陰

金山來信並呈遷徙唐人街事審司批駁云今創此例不分良莠一旦逐出埠外顯是強奪彼產也著不准行 因查美國察院審司之員其人必向爲律師素端品行又年過五旬方准充當充當之後如無過失則終其身此等人大抵不侮鰥寡不畏強禦素有直名者其俸與各部長同故亦不求遷調而惟各行其志凡所訊斷一秉至公猶有古道存焉

十五日陰

向來逢令節使者及隨員等卽於大廳行禮此次非慶賀約於辰刻而繙譯二員究以不能早起不到 聞

醇親王之恙已痊中外額手相慶

十六日晴大風

接總領事左庚函知彭承謨因金山物議沸騰急於告假啟行回華已電覆允之 美國家近禁止呂宋票入境不准信局代寄不准銀行兌銀云 因本年赴日遞

國書應酬之暇嘗考究日國政事於售呂宋票事亦知其詳凡售

票之欸提出四分之一以充國稅

如收銀十萬兩則以二萬五千兩歸公

其餘除費

用外分作頭二三四五采給得采者其采票之屬何號惟臨時始知之其法如開中之掣簽分卷不用簽而用珠珠置兩空球中一爲號數一爲采數每球一轉則一小珠出如此球所出之珠爲一

號彼球所出之珠爲頭采則一號得頭采此球所出之珠爲二號彼球所出之珠爲無采則二號空矣其轉球之人爲童子凡有票者均准往觀故無弊端而多購之者然收十萬金而但以七萬五千金爲采又除費川則購票者之所失多矣敢以告中國之購此票者

十七日 晴陰

郵政局總辦凡吳客脫來謁言天津鐵路被飢民折毀英人欲通商於滇省謂雲南之西崇山峻嶺皆自北而南苟出緬甸通以鐵路可順山而行無鑿險縫幽之苦果能從速測量興築鐵路數年之內卽有火車達於滇境數十年築室道謀者一旦成功大快人

意且法人已居於蒙自開闢利源英人豈可甘心讓之云 因謹
按六經無堪輿之說自禍福中於人心而遂有陰宅陽宅之論其
實皆影響耳中國鐵路開鑛二事皆爲堪輿家所忌夫地球厚三
萬里開鑛至深一里不過入地三萬分之一耳何足言損且堪輿
家好言氣氣固無不之也而何以分有氣無氣且大塊共一氣也
又何以分生氣死氣歐墨各洲若英若美鑛廠鐵路極多民亦極
富未聞其有所不言也

十八日 陰小雨

謁律師又謁凡吳客脫聞是日散議院 英人在緬甸自曼得來
至怒江測量道路以便興設鐵軌途中多遇險阻內有一處須駕

橋長三十丈至五十丈始可免縫鑿之費云 因按英得緬甸法得越南極力經營均以鐵路爲當務之急比利時爲歐洲小國介於德法之間國中鐵路至多商務亦至盛然則疑鐵路之有礙於防務者非也

十九日 大雨

律師來 郵政局總辦凡吳客脫來見 駐日本大臣來電調繙譯李維格 伯林來電云德國主至啟爾埠閱海軍并溝通北海與保耳剔克海之大工次日北行至丹國兵船一羣隨之與丹君相見後命駕至那威見其君至西上月底返國後又爲英國之行閱秋操畢現將往俄及奧與奧主同閱水陸大操云 因查德之

前王威稜第一少好武藝其未卽位以前竟當兵官馳驅征戰卽位以後戡義戡奧戡法已及暮年乃至耄耄巡歷不息可謂勤矣今王繼之不自暇逸國之富強如昔其有乃祖風乎

二十日晴

卡拿大地方土人上書政府謂華人日眾吸食鴉片有壞風俗請禁入境 因謹按華人習勞苦故工作勤而工價賤所至之地公利之而工黨妒之故藉口瑕疵以期禁止其來但卡拿大政府已收華人身稅按名五十圓准其安居與美國之情形迥異必欲禁之是失信於人也

二十一日晴

俄王曾出諭禁止耶穌教會中牧師無護照者只准在俄國邊界
行教不得深入名都大邑云 因查耶穌教爲因果之說與佛教
相似其用意亦無惡於天下惟行之者多藉以執法故招怨耳俄
崇希臘教本與耶穌隔膜其限制之以防滋事宜也但非強國而
出此則或以啟釁爲虞矣

二十二日晴

接總理衙門電旨阻韓借款事 因於朝鮮向美國銀行貸銀事
已面見外部告以必不可貸外部已允美國家必不貸矣又與律
司商之律司以爲宜刊報使通國周知則商家亦無貸之者方可
止也適北洋來電亦如此遂刊入報

二十三日雨

新嘉坡來電云現爾埃白金礦以三百五十噸礦石化場獲淨金八百七十兩核之每噸計得金二兩五錢云 因嘗以開鑛事詢諸李格士銀行之總辦據云金銀之鑛雖有利而亦有弊防其匿鑛質也若銅鐵錫鑛及煤鑛其利尤厚如辦理得人則取之不竭有留心鑛務者慎勿重金銀而輕煤鐵也

二十四日雨

駁詰美國禁工苛例照會外部後本日美外部覆照會云總統已與各部諮院商議非有意遲延不復云云 因查美廷之久不照會者非有意而實有故也律師嘗言之矣美自違約中國責美以

違約義正辭嚴美將自以爲是乎而不敢也美將自以爲非乎而不願也此不照覆之故也

二十五日晴

接北洋電美兵船二艘在韓調水兵上岸送韓太妃葬屬向外
部阻止卽往見律師本日外部不見客明日往謁 俄屬阿蘇里地
近以華人屬至擬重征身稅以禁之又高麗人之至者亦同征稅
因謹按中國人數四百餘兆甲於地球商務未興謀生計絀故
華人足迹徧地球所到之地地主卽征身稅以爲利雖暹羅爲中
國之屬國猶效尤焉惟美國尙不因以爲利而又見忌於工黨限
制綦嚴則華人之不幸也

二十六日晴

李維格啟行赴日本 午刻謁外部爲言美國兵船在朝鮮派兵
送朝王太妃之葬爲向來所無朝鮮頗懷疑懼請電止外部答曰
本國未得駐朝使信未悉其詳泰西之例兩國有交誼例以兵隊
送葬爲禮美與朝既通使則禮所宜毋庸電止因又言朝鮮近年
民情恟懼忽見客兵入國殊不安堵故爲之請外部云朝鮮未見
來電不知其不願與否以兵送葬爲理之常未便輕率電止且朝
鮮之所慮者俄耳中國欲保全朝鮮但當防俄而不必防美美斷
不覬覦朝鮮中國可以息慮朝爲中國之藩中國不願美兵送葬
但飭朝鮮力辭則美當遵耳遂辭出

二十七日晴

京北漠河金礦出金頗旺工人至萬餘名風氣漸開亦我

國家富強之兆 因嘗聞諸父老有明之季開礦之舉閩人專之利則入己害則歸公故後人遂以開礦爲弊政而不知歐墨兩洲其富強皆以此也比利時小國耳其民僅五兆而開礦者至十萬人其國雖小而富焉亦可以覘風氣矣

二十八日晴

律師來言美兵船在朝鮮以兵送其太妃之葬事屬致敬於與國無關交涉之事亦無保護之心中國可以不問問亦無益美國斷不因中國一言而肯失禮於有約之國也 因查墨洲皆小國而

美無兼併之心歐亞兩洲不聞共有屬國則其心可知矣其禁華工也實以民主之邦將順民心非有猜嫌於中國也其於朝鮮何覲覲哉由其所言以觀其所行其用心可見矣

二十九日陰

日斯巴尼亞現以紐約領事爲駐美公使意欲與美國立一通商和約專爲古巴起見外部大臣布連將與商議云 因查古巴爲日之屬島而與美鄰英人嘗攻之矣美不聞覲覲焉美新與各國立報施之約古巴與美互市至多故日欲與美立約耳

三十日雨

外部來文以派員查金山埠戶口並所習技藝請飭中國總領事

署幫同查核云云此案是否恐中國領事以前照會所云華民不過八萬人不實抑或謂華人開設賭館煙館妓寮不合故爲此舉已屬金山總領事加意伺察以爲防範之計 謁外部

九月初一日 大吉兩

閱前任鄭案美國飄折地方管稅官來信以英屬域多利華人日盛現已有二萬五千人宜設領事以資保護鄭大臣覆以暫緩因謹按中國不願設領事者以設一官卽增一費國帑支絀不可鋪張意甚是也然外國領事之費卽取之於商民蓋以國爲民設官民自爲官籌費我

國家自新加坡初議設領事時建議卽以船牌之費爲領事之費

及其既設則又不然

朝廷重違其意委曲從之自此以後成爲領事之費由國籌之老成深算謂以中國百姓之脂膏爲外洋遊民之保護重外輕內謀之不臧於是各處求設領事者均作罷論矣

初二日晴

英報載美國草昧初開僅一百年其創始者爲華盛頓神聖英武富強之事以次遞興越一百年國富至十餘倍其富強之道以鐵路爲第一關鍵故地球鐵路惟美最多亦惟美最富也南墨洲銀國效之極意經營已成二萬六千餘里尙擬再興運出之貨年盛一年火車至不敷用一千八百八十九年又增機器車一百七十

八乘人車一百四十五乘貨車五千四十八乘商務日興矣 因
按華盛頓拒英而美始爲自主之國於美爲德於英爲讎乃美人
愛之而英人亦稱之亦可見公論在人心而盡心爲國共事可爲
焉

初三日晴

奉北洋冬電兩次爲朝鮮事當卽與外部約訂晤期訂以已刻到
時已有南花旗公使先見因於第二起見外部先作寒暄語因曰
貴大臣二十八日所言已電中國政府及北洋惟朝鮮葬事已逾
二日貴國兵船之兵仍駐漢城且帶有礮三尊藥彈數箱兵官二
員朝事正在危疑之際易啟猜疑請貴大臣電止外部曰譬如美

國兵船到中國天津上海地方中國如有喜慶之事派兵上岸入城以誌歡忭中國不疑他國何必猜疑因曰時爲之也昇平無事之時人情本自恬然兵船派兵上岸且又不久何猜疑之有今朝鮮國事正屬危疑美國猝然派兵上岸且帶槍礮又如此之久焉得不疑外部曰美國持盈保泰匪特不貪他國土地並不願干預他國之事無庸疑慮因曰中國之所疑慮者非慮貴國之兵慮他國之效尤而起也貴國能保貴兵船之無他不能保他國之一一如貴國也且貴國既不願干預他國之事何惜此一言阻止兵船之兵如果阻止於貴國持盈保泰之名愈有益也外部笑曰日本大臣並未據駐朝公使公文實屬不知其事可見我國之無他今既

據貴大臣屢次言之當照兩次所言知會駐朝公使派兵入城中
國既不願以後切勿輕易許兵入城可也 因曰貴大臣如此辦法
益見貴國之善持盈保泰矣遂寒暄數語握手而退

初四日 晴大北風

前月巴拿馬商董易佐才等以該國土人議禁華人不准在該埠
開設店鋪並不准傭工因稟請救援當以該埠爲可俞國所轄卽
往謁該國駐美公使又託美國駐巴拿馬領事代爲轉圜茲據該
領事阿丹信復書稱已向該國政府及該埠巡撫婉商不宜驅逐
華人開罪中國該國已將土人所立苛例駁除不行該埠巡撫且
謂華人勤而耐苦實爲難得當保護之云云查中國與該國向未

立約不能自向該國詰問只可婉轉設法尙幸可行否則華人又苦矣

初五日晴

祕魯吳濬來信言智利土人因美國銀錢價賤物用漲價土人作亂搶掠各國商民均有遭劫者所失貨物中國約值銀二萬餘兩因未立約無從索賠稟請駐祕參贊設法因與智利駐祕公使商之該使不敢與聞因令商人自請律師赴智利國家控告查泰西各國無不相立和約相求通商而國用不缺者由於此項費用取之於商也中國向無此例故遣使之費取之於國而四成洋稅有限不能擴充故不能盡設參領而保護之權有所不及固勢有所

限亦法有未備也

初六日 小雨大風

聞初三日英屬域多利地方有華人二十名私入美境爲美國關吏所見遂拘執之 因查自光緒十四年美國違約苛禁華人而華人遂由英屬潛入美境於今年美漸知之法網亦漸密矣

初七日晴

金山美七號新聞載美國嘉省新聞其升調每以能苛虐華人者爲先以其能得工黨投籌也現任舌地美印判久候本省總督之職故屢出苛例酷虐華人刻總督缺出該員巡遊各埠宣言於衆謂如得此缺必立新章以期益土人而制華人工黨然礮相迎待

之盡禮 因觀於此而知禁工之例必不能除也美之在官者無不以苛虐華人爲富貴之階工黨稔知之亦卽以此牢籠在官者遂覺沅瀝一氣而華人益不聊生焉

初八日晴

聞斐市那埠各園因百果成熟需工孔亟甚愛華工僱工者每日願出工資一圓五至一圓七角而苦人數不多洋工亦一圓五而火食在外且不受約束故園主願僱華人也 因謹按美國各公司皆喜華人而惡埃黨而華人之勢卒不敵者未嘗入籍不操保舉之權也或曰各公司亦操保舉之權美之官紳何以媚工黨而不畏公司乎因答曰鐵路製造蔬園果園此數公司者每一處用

人多至數千少亦數百而保舉之例向按名而投籌縱使各公司盡爲投籌度美國之公司計數當不過千耳而所用之工黨則千倍之公司之勢只抵工黨千之一耳美之官紳何畏哉審勢量力欲美之不徇工黨不禁華人必不能矣

初九日晴中夜大風雨

謁律師戶部 俄王以宮牆附近常檢獲炸礮等物疑係尼希利黨所爲故欲遷往兀芝那宮不料兀芝那宮亦早有之遷宮之議遂罷云 因按俄主好兵比鄰諸國皆側足而立時時防患之不懈固無有敢加兵於俄者俄真無外患矣而不意其患生於內且防之而不勝防也人乎天也

初十日 大雨大東南風

美國新定稅則洗衣漿粉入口每磅抽銀二分所以困華人也英國以美廷增稅新章有礙英國商務已與美廷辨駁 美國費城保護華人會會首來信謝去年善捐並訂西十一月十九號赴會又云已公呈上議院除苛待華人之例云 因謹按洗衣之漿粉每磅值銀不過二分而入口之稅如之且他國均無此物是專爲中國而設也假使中國照美之稅漿粉者稅美國之麥粉卽以每年五十萬桶計之每桶成本銀八兩稅亦八兩則每年稅銀四百萬兩矣漿粉麥粉同一物耳中國如毅然行之美將何以措詞哉

十一日 大北風天陰

駐祕參贊吳淞來信以祕魯田寮急需華人作工共寮東屢次來求向中國招工並立保護工人新章以冀中國允許因謂華人出洋遭虐未有如祕魯之甚者前此智祕搆兵華人慘罹殺戮者四五千人此外爲寮東虐斃者不下萬人以後中祕雖立約保護華人該國紀綱不立上下相蒙雖有約而不能行徒託空言迄今中國之民猶憔悴於虐政也應俟該國能實力奉_行保護華人之約再由中國察看方可相商

十二日晴

繙譯李維格經出使日本大臣奏調赴東洋前月底已啟行使署繙譯一人力不能給查有以前肄業局學生容揆在美國理海學

堂用功洋文尙優當卽札調於今日申刻到署 因謹按出洋肄業局始於光緒五年撤於光緒十一年費庫帑數十萬而所培植之人才甚希則經理非人故也

十三日兩

西歷七月九號報載美國東方諸大省近來以科司達律司所上議院條陳及駁下議院馬羅苛禁華人新章均謂美國立例不公羣相皆議又美國富戶名百嘉省亦著一論以駁禁止華人之例登諸日報而紐約波市頓釐爹兒費亞各埠新報所紀亦同意者美國尙有不阿工黨不冀顯宦而不昧天良者乎 南洋來電以向云者斯德廠所定之槍係雙機槍頭如未請驗無驗過回文

者不收云云 聞翰林院侍讀許景 派充俄德奧和公使

十四日晴

新金山土人之工役嫉妒華人逼國家立禁國家不得不從矣乃附近太平洋一帶之漁戶謂華人不來則取魚醃魚均少人而金山沙末魚之利將來必爲他人所奪現在議舉人員至金山省往見大府請速開禁云 因查新金山草昧初開人煙稀少墾荒開墾在在需人其欲華人之至者商人興利之心也其妒華人之至者工黨專利之心也公私不同故意見各別耳

十五日晴

七月中旬巴拿馬商董以可倫國土人議禁華商會集千餘人挾

制地方官逼令華人出境稟請救援當以該國與中國向未立約
無從照會卽往見該國駐美公使託其致意政府公使允之又求
外部轉致美國駐該國領事面向政府言之月初美領事已有回
信言該國不准土人凌虐華人因當卽復書致謝本日接駐祕參
贊及嘉里約領事來函稱可倫政府不准土人創驅逐華人之例
其創亂者已拿獲百人監禁華商貿易如常矣 同文館總教習
丁隄良來謁當與晤談良久該教習於美禁華人頗持正論因甚
嘉之當卽答拜並訂十七日公醮 是日律師帶丁隄良見美總
統

十六日晴

律師來言已見丁璉良擬於十八日請美國大員與丁璉良相見俾丁璉良所言與衆聞之頃已偕丁璉良往見總統丁璉良尙敢言因以美國駐巴拿馬之領事實心保護華人欲咨請總署賞給寶星律師謂美國官員向例不許領他國之賞前此公使田貝承中國

皇帝之賞佩帶爲例所格乃存之博物院以示後世而記中國皇帝之恩此破格也今欲賞美國領事官以寶星必下議院議之議院未必准受不如將來赴祕過巴拿馬時親往道謝以使使者之意贈以什物如投桃故事該領事可以受以後亦必保護華人也因額之

十七日晴申刻四面皆晴而近數十丈獨雨如中國五六月時氣

候

申刻下遽良至醺於大餐房具中國饌從下所願也使館參贊以下畢集下故善飲健談言及前次請假回美曾歷地球一周由中國向東而至金山至美都至大西洋至英至馬賽至紅海至香港皆指東而行仍返中國可見地球之爲圓形四面皆空皆有人物又言泰西人好游其君往往出遊如英法俄德義奧之君終年涉歷他國如春秋時覲遇會同之典亦風氣然也因言中國欲開風氣須諸王貝勒游歷東西洋並以詞臣之諳外洋掌故者置諸左右則自

天子以至百僚皆知今昔之時勢矣丁又言地球諸國近以英俄
美法德五國爲強大究竟法與德壤地褊小無可恢拓不若中國
之地廣人稠得其人則自然強富不待開拓而開拓亦易圖也此
外則俄可開拓英雖三島而各洲之屬地甚多新金山一洲卽可
抵亞洲之地美則地廣而未開墾者尙多過此五百年不患人滿
百年以後中國美國英國俄國此四國者勢當相埒亦慮相并矣
坐中有言日本厲精圖治泰西各國以小英吉利目之然則日本
亦屈一指乎丁未對因笑曰日本果能強乎泰西各國有譽之者
因其曲意趨承奉若神明事如父母故以好言慰藉之美國新聞
卽譏其設議院而不擇議員所議者適便私圖不足與謀國矣其

千餘年而君不易姓者前此日本國政由大將軍故千位者不爭君位而爭大將軍耳其國形勢四面皆水當鐵艦未創以前誠有湯池之險今則鐵艦之製日精礮力之及日遠日本失其險矣元世祖平湖之役兵艦未行且亦僅攻其一面耳近年以來其勢非復從前矣如德川氏之季年美艦入賀浦旋入下田俄艦入大阪旋入唐太英艦入箱館旋入長崎往來倏忽電掣風馳日人設守無方未攻先潰國不亡者幾希何強之有泰西以俄爲狃以英爲獅言其猛鷲也以中國爲象言其力大而笨也以日本爲猴言其跳躑輕狂而實無用且事事步趨人也丁大笑以爲聞所未聞至戍而散赴律師處

十八日晴

是日律師偕丁璉良見外部布連布連於十七日由西省地方回美都不願見客因費城會請共十九日入會卽當與郵政局大臣同往故丁璉良不能見面 是夜律司科司達設茶會請美官紳見丁璉良有按察司與焉丁璉良爲言中國近日興武備設海軍地大物博指日富強並言中國聲明文物之盛坐中聽者皆拍手稱善夜闌同赴大餐房啜加非茶並陳設果食隨意取啖賓散已交子刻矣

十九日晴

參贊彭光譽是日醺丁璉良用洋餐因向不喜洋餐故不與 二

十三號西報云現屆嘉麟寬省總督任滿之期故在本省入美籍者紛紛投籌各舉所知現任嘉省知府名薛地羊亦將任滿候調有欲舉薛地羊爲嘉省總督者工黨中謂其昌言不喜華人而所開之礦地仍用華人口是心非必不可信因將該府所爲列諸新報以明不舉之由云云工黨之勢燄如此宜美之欲躋高位者專以苛虐華人爲階梯矣 初七日有華人三十名由香港附船至墨西哥又由墨西哥至美境爲關吏所獲現擬仍附香港船載回二十日晴

美總統定於明日已正赴印地按拿保利士埠約二十二日辰刻可到按二十二日爲各員公舉官員之日總統意欲親身投籌保

舉人材是晚卽啟程回華盛頓云 因謹按三代以下當國之君亦有收拾人心之事大抵損上益下施惠及民耳未聞以筋力爲體也美總統可謂勞矣其意在聯任乎

二十一日晴

金山二十日電云柯順匿輪船由橫濱至埠接日本大阪電報謂中國兵船兩艘由釜山往仁山距仁山約一百八十里猝遭大風以致受傷又言俄國頗垂涎朝鮮云 因謹按俄覬覦歐洲歐洲諸國合縱以拒之遂致力於亞洲中國新疆蒙古黑龍江伊犁地方節節與俄爲鄰朝鮮尤爲扼要之地日本尤與朝鮮鄰近俄人盪惑朝鮮將來恐有齟齬之事日本介乎兩大之間不與中國脣

齒相依朝鮮入俄日本豈能安枕惜其予智自雄不親所當親而與中國存畛域也後必悔之 丁躔良來見言外部今日事冗可見不可久談請於明日巳刻來可以久敘從之遂未見因來辭行云明日見外部後卽乘火車往巴藍埠赴友人之約改日卽返費城

二十二日晴

二十二號報英屬域多利有華人三十二名附船至美之匹珠桑埠爲該處稅關查獲又送回域多利而英稅司須每名納稅五十圓方准入境是以美員仍押回美山輪船撥回中國 同日新公司帆船庇釐岸由金山赴香港載華人七百名華婦十名可見華

人之回中國者多矣 午刻往送丁韞良行丁韞良已見外部矣
二十三日晴

新報載威海衛爲遼瀋之咽喉間已與旅順口大連灣均築礮臺
駐重兵惟金州地方寥闊海口平夷明時日本兵犯遼東曾由該
口泊船率師上岸明永樂間曾設城堡立烽火斥墩現聞李傅相
深謀老算防患未形已派員勘地繪圖興辦守備如能集事奉天
吉林鎖鑰嚴固矣 因按外洋各國留心武備善於偵探中國如
慎固封守無隙可乘亦可以消其侵陵之志是不戰而屈人伐謀
於先事也

二十四日 天氣轉寒晴

酉刻總統回華盛頓知今屆所舉南黨議紳比北黨多一百二十人尙不止四十人也 因查美自南北交關後兩黨隱如水火南黨人數多於北黨故下議紳獨多議紳多而權遂重此南黨之所喜而北黨之所憂也現總統爲北黨其有戒心乎

二十五日晴

中國山東鑛務局在美國鉢崙埠購置開鑛機器一副計銀十四萬運回中國 北京輪船由香港來美之金山搭客一百二十二
人洋煙一百六十二箱照美國新定之稅納稅六千六百四十二圓云 因按美國不禁洋煙入口而重其稅何也蓋禁其入口則偷漏必多是有弊而無利也重其稅者卽於不禁之中寓禁之意

焉日國之收呂宋票稅新金山卡拿大之收華人身稅皆此意也
從前廣東闖姓賭博大吏以征稅爲失體不收稅而嚴禁之粵人
乃徙博局於香港澳門縱賭如故此明徵矣外洋無軍徒鞭撲之
刑均以監禁罰鍰苦工代之不僅省養囚之費而且資其力焉其
亦有當以人治人之道乎

二十六日晴

紐約來電云美廷購銀輒以備鑄銀錢之用茲兩月內已購得一
千零五十萬兩可敷鑄錢矣 美國兼些士埠出產牛羊運至墨
西哥國出售墨國稅關收稅甚輕現因美廷更立新章於墨國進
口貨物加抽稅額墨國亦效之新定稅則於美國入口牛羊每卡

稅銀五百圓以報美國之重稅美商苦之 因查墨西哥爲墨洲小國弱而又貧與美接壤如美與開釐美之兵隊可朝發而夕至其邊也乃於美加收墨國之稅者墨亦效之以加收美國之稅美固無奈何也稅則者固國之內政而應由各國自主也

二十七日陰

安徽省哥老會匪與客民糾結爲奸日深一日因於光緒十四年十月曾經奏請查辦以安閭閻奉

旨發交兩江總督安徽巡撫辦理茲家鄉來信七月間哥老會匪於皖南石埭縣地方潛謀不軌經皖南總兵史宏祖立派馬隊數百名馳往勦辦當卽拿獲唐玉狗等嚴訊供稱會首頭目周子意

窩留村民汪啟元家業已逃走當即將所獲之匪解省經巡撫沈
審訊屬實一而出賞格嚴緝務獲嗣於八月間在江西所屬地方
鄱陽湖拿獲周子意及其妻九月初二日解省初九日並夥匪鄒
老三二名與周子意共三名正法安省皖南地方當可暫時靜謐
惟會匪之首領必須拿獲方可太平耳 墨西哥國參贊來謁該
國志在立約招工因以總理衙門不願立約已屢次婉辭惟聞華
民之潛赴該國者已多利之所在人爭趨之將來必至如美之立
例苛制前任鄭大臣謂不如於該國欲招工之時因其勢而先立
善法較易就我範圍其言未嘗無所見也 昨日中國來電謂太
平府火藥廠失慎全廠炸毀焚死工人三百名

二十八日晴

義大利公使來函今日已刻送哥士答力憂國代辦參贊發引卽
偕何繙譯赴約各國公使到者約得半美外部到派馬隊一百名
送葬戎服列隊於門外以待 美國報言中國武弁礮員十一人
有德員帶領至德國依勝城克虜伯礮廠又往基路城水師署遊
覽足見中國之留心武備矣 因嘗聞德國駐美公使言以前中
國所派學生至德國武備院學習陸軍陣法甫屆三年乃又欲入
兵船學習不知陸軍之奧妙進退縱橫疾徐開合學之十年尙不
能盡德國之民凡學習三年而出院者不過爲當兵計耳若爲統
領者則終其身寢饋於中未敢舍而之他故陸軍人員每全不諳

水軍之事者其心專也因憶其言因附誌之

二十九日 陰夜雨

接上海包封北洋言禁高麗借款詢金山遷徙唐人街事南洋咨請驗云者斯德廠槍彈事 地皮公司來謁言中國時事越南已歸法緬甸已屬英琉球已入日惟美國守不貪之舊訓與中國無猜現在可虞者俄人有意於高麗吉林英法生心於西藏滇粵中國當自強以防之 家鄉來書言皖南廣德州西鄉有哥老會匪結盟聚衆經地方官帶兵擒獲頭目一名並獲窩家搜出偽照盟單各件 因於光緒十四年十月曾經奏陳惜地方官不能早殄萌芽以至蔓延爲可恨也